

廣靈縣誌卷之十

藝文誌

藝文者誌書之餘緒也修誌者類以藝文綴於卷末用以紀運會之盛衰景物之佳麗興作則有記人物

則有傳如斯而已廣邑雲中僻邑也寫太平則唐太

宗飲馬長城窟一首盡之

詞曰塞外北風切交河水已結瀚海百重波山陰千

里雪迥戍危烽火層巒引高節悠悠卷旆旌飲馬出長城寒沙迷騎迹朔吹斷邊聲胡塵清土塞羌笛韻

金鉦絕漠干戈戢車徒振原濕都尉反龍堆將軍旋馬邑揚麾氛霧靜紀石功名立荒裔一戎衣靈臺凱

入歌

雲中之盛即廣邑之盛也寫離亂則子蘭一首盡之

廣靈縣誌

卷十 藝文

一

詞曰遊客長城下飲馬長城窟馬嘶聞水腥為漫征人骨豈不是流泉終不成潺湲洗盡骨上土不洗骨上冤骨若不沉水四海有還魂空流嗚咽聲聲中疑是咽

雲中之衰即廣邑之衰也又山邑無多興作其文廟

城池等記已悉舊誌八景雖多附會但名人題咏頗

繁亦選其尤者載入誌內唐宋以前如筆公等前史

未盡以為廣邑人因舊誌鄉賢既已採入即仍之以

光誌乘惟勝朝王李二公之精忠

本朝二韓之孝友二周李仝之節義浩氣貫日至今猶有

生氣舊誌或載或闕畧無表章殊屬憾事爰同共事

諸人或立之傳修其墓有能詩者並為題咏雖曰誌

書之餘緒其于振興風化不無小補云爾誌藝文

重築廣靈城碑記

熊璋  
豐城人

宏治紀元之八年沙河孟公繼先奉命來治廣靈邑臨北邊土瘠民貧素號難理非才通識敏之士或不足以為有為也侯到任首以課農興學為務平催科清訟獄不苛不擾民甚便之尤慮縣近邊境無以保障斯民雖有古城年遠傾圯欲修築葺理以為保障之具于是申達於各上憲設法措置庀材鳩工起於九年三月落成於十年九月城郭樓櫓煥然一新足以聳人之觀瞻壯邑之金湯矣侯蒞政未及三載政通

人和百廢俱舉復丐余文以為之記余維侯之加惠斯民博矣既教養之周尤保護之至真無負於民之父母哉昔卓茂由密而陞太傅周榮自鄆而擢尚書魯恭起中牟而官至司徒皆由治邑獲褒寵之榮也侯若不自滿假益勵厥守殆將與曰茂曰榮曰恭齊驅而並駕者矣遂為之記

甄包廣靈城記

翰林院  
劉虞夔  
高平人

嘗讀易曰王公設險以守其國惟城斯險惟險斯固郡邑之不可無城也尚矣但築於土者厥功若易而難於悠久惟包之以甄則金湯鞏固而利及萬世謹

按廣靈邊關伊邇民易罹鋒鏑前令尹東光王侯春鑿土木之變始謀重築延袤三里許若堪保障而襁久傾圯保安張侯理南暨馬侯承志相繼修葺視昔頗可觀而悠久則未也隆慶辛未喬侯甫視篆登城眺望憮然興嘆曰斯城可以衛吾民乎今天子聖明邊境寧輯然未雨綢繆古人所尚及是時而包以甃可保無虞會督撫吳公閱邊令郡邑土城者磚之檄至侯欣然喜曰吾素志也乃謀諸守備程公萬里典史吳橋宋汝楠及邑之薦紳耆耆量地度基計工分力慮財之匱也請給於內帑白鏹七千餘兩恐民力

綿弱借蔚渾民壯若干名又簡省祭王宦等及陰陽之勤敏者分董之衆聞命若躡赴義若趨砥礪伐諸山薪薰取諸野磚垣成於陶甕餐餽於傭彈力供役弗緩弗急侯公暇躬蒞其地檢勤惰而勸懲之以故動雖衆而閭里不驚勞雖大而功爲易就未暮年而雉堞翬飛巍峩屹立厥績告成矣美哉洋洋乎誠萬世之利也城周圍三里五分仍舊貫也石基三尺磚八五聯冀堅久也垣高四丈女牆七尺杜侵侮也門樓二角樓四遠觀望也敵臺有八上置舖舍便防守也濠之深濶俱三丈固地利也非侯慮周而識遠謀

定而畫詳胡能底績若是耶是役也經始於萬歷甲戌落成於萬歷乙亥侯諱密字汝登別號東潁陝西同州人也乙卯鄉貢進士今陞霸州刺史廣靈以侯行而功不可泯俾余掇摭其槩若興學校禮薦紳卹孤糞墾荒田鋤豪右節冗費操堅不改廉勵無求善政種種將必與斯城俱垂悠久民之口碑自在焉

廣靈縣重修文廟記

翰林侍講張天瑞 清平人

今天子卽位改元宏治春三月上旬吉視學先期命有司修飭廟學蓋崇儒重道爲天下先卽古昔聖帝明王繼天立極君師億兆之盛意也亦將由此責天

廣靈縣誌

卷十 藝文

四

下郡邑之有司其亦當仰體聖明於萬一哉廣靈邑屬雲中戰國代地也國朝宣德間卽有廟學以隆祀事資師生講習時就簡畧規制弗稱月日邁征寢就頽圯適東魯寧陽程侯來宰是邑滌篆餘卽謁學展禮先聖先賢已而進諸生暨儒師詢廟學廢置訖旋卽視事蓋中已有定規不預言也爰考滿政通人和年穀乃登百廢斯舉工鳩不苦材庀孔良民無驚畏費有酌量始新大成殿爲間凡五深四丈廣六丈高如廣之半有奇瓦砌琉璃木飾青碧宣聖配哲悉以塑像次新戟門爲間三高二丈四尺廣三丈七尺東

西廡爲間各五深廣高如殿之半諸賢位悉易以木  
主次新櫺星門爲間如戟門數明倫堂日新時習二  
齋亦如之而堂之左右翼以兩間爲廂房其一供宴  
息其一貯史籍深廣高視殿制三之二儒學門則自  
東移之櫺星門右與南山黃花嶺相直後踞城垣前  
迎高阜左右閎壯視昔有加射圃則移之學宮之西  
泮一亭曰觀德於號舍厨庫祭器罔不畢舉是役也  
興工於宏治乙卯春三月落成於是歲秋七月吉其  
寮宥師生輩莫不相慶曰吾侯此舉一時之盛事矧  
六事俱舉而此則六事中第一事不刻之石其奚以

傳乃介書於予爲之記惟曰凡有興作政必通人必  
和事乃克濟以侯之政事皆得其宜以侯之人民皆  
得其歡心以政事人民旣通且和如此所以仰體聖  
明崇儒重道君師億兆之盛意而爲此聖賢祀事師  
生講習之盛舉非其心之存於中者有素而其才之  
發於外者有爲殆不及此又况教化之所由行人才  
之所由出悉此焉賴使凡爲有司者皆若此則夫聖  
明之責望有司之職任其有不能仰副而畢舉者哉  
若侯之事功信可紀也遂備書俾刻之侯名觀字子  
昇以詩經擢成化丁酉鄉貢進士初授蒲州學正教

成晉今職云

重修文廟贊

小引

刑部尚書 魏象樞 蔚州人

聖道之大如日月經天如江河行地無微不通無幽不照學者仰止宮墻自少至老日用飲食五常萬善孰敢不敬守我 孔子家法哉廣靈貧邑學廟久傾絃誦間歇今邑侯焦公來蒞茲邑能知大體首先倡捐而鼎新之以崇祀事課諸生典禮備文教興矣工成屬余一言為之贊贊曰讀聖經感人心學宮茂草任銷沉修蘭若捐多金世俗江河已到今彈丸邑窮子衿仰止宮墻歲月深瓦礫亂風雨侵補葺還愁力

廣靈縣誌

卷十 藝文

六

不任嗟乎嗟乎事其事空谷音

重修學廟序

譚 愷 邑人通判

學宮治平之本也三代而下稱盛世者莫若建武光武息馬論道親祀闕里傳至孝明臨離拜老執經陞座園橋門而觀者冠帶雜還故一時風物莫不炳炳燐燐焉推之郡國下邑各立學校則任茲土者不惟簿書期會而已必以教化為大務俾君子由以育其材小人亦以輯其志泮宮數仞豈在廟貌棖桷云爾哉廣靈菁莪蔚興英賢繼起其由來尚矣近年兵燹頻仍凶荒疊見士子謀身尚且不遑奚暇計及學宮

乎仰瞻廟宇大成殿墜瓦飛鴛四維雖尚可支亦難  
免風穿雨濕之虞兩廡俱斜欹將仆數椽零亂再觀  
戟門櫺星門暨鄉賢名宦兩祠棟折宇摧垣頽壁破  
牛羊伺以爲囿市人走以成衢肅穆文明之地竟爲  
茂草瓦礫之場矣邑人士雖歛歔感嘆終不敢輕爲  
修舉邑侯焦公甫下車謁廟日覩心慘慨然以修葺  
爲已任爰集紳衿而謀之予焉先捐其貲因思工程  
浩大物力艱難非藉衆助莫能成也諸士志不忘本  
無拘多寡隨其力之所至而樂輸之庀材鳩工亦能  
次第就理將見廟貌新則禋祀肅教化廣則德業進

甲第踵興人文蔚起矣聶王諸公豈獨專美於前哉  
余願諸同志無負邑侯興學造士之苦心以共勦盛  
舉云爾

重修城隍廟記

巡撫都御史 雷復

先王制禮皆以義起者也禮曰凡有功德於民者則  
祀之然城隍之神其祭昉於何時乎自唐以來郡縣  
皆立廟以祀後世因之所以保障生民通節乎內外  
默相陰佑厥功彰彰於旱蝗則禱之於癘疫則禳之  
于歲時則報賽之視他祠以令式從者爲尤謹非所  
謂有功於民而祀之者乎廣靈之有城隍廟蓋舊制

也歷年茲久既敝且陋令尹恒山孫侯一日行事祠下慨然嘆曰廟所以棲神今其廢壞無以蔽風雨則神且弗棲况舉吾祀乎於是捐資命工掄材以葺而新之民皆歡趨以就工役無敢後先闢其基址增其舊制前爲堂肖神像於其中後爲寢室外爲三門庖福有次望瘞有所繚以垣墻堅其扃鑰堦除之下樹以名木鐘鼓籩豆百廢俱舉規模制度輪奐交錯經始於正統九年秋七月朔旦落成於明年之六月望日賔從僚吏胥晉祠下乃以羊豕告祀焉復不鄙遠以書屬俾書其事惟夫令之政治民事神而已邑之休戚舉係於令神能警動福禍以食乎民古之人必先成民而後致力於鬼神則民和而神乃降之以福否則黍稷雖馥神其吐矣此其所以爲神民之主也孫公之令廣靈盡除前令之弊以廣維新之化薄於奉養而厚於鬼神卑其室廬而宏其廟宇故能蕩滌爲祥化癘爲和嘉谷用登民俗丕變神用歆享百靈感從公可謂知所當重故爲不悖於義矣是用勒之石以垂永久云

古弼傳

北魏史

公代人也少忠謹善騎射初爲獵郎門下奏事以敏

正稱明元嘉其直而有用賜名曰筆後名弼以其有  
輔佐才也令典西部縮機要太武卽位以功拜立節  
將軍賜爵靈壽侯歷位侍中吏部尚書典南部奏事  
鎮長安有威名征仇池平之叅政事遷尚書令雖事  
務殷湊而讀書不輟端謹慎密口不言禁中事上谷  
人上書言苑囿過度人無田業宜減大半以賜貧者  
弼入欲陳奏遇帝與給事中劉樹碁志不聽事弼侍  
坐良久不獲申聞乃起於帝前捽樹毆之曰朝廷不  
理實爾之罪帝失容放碁曰不聽奏事過在朕樹何  
罪置之帝奇弼公直皆可其奏弼曰爲臣逞志於君

前其罪大矣乃免冠請罪帝溫語褒之太武田於河  
西弼留守選肥馬備軍實以羸馬給獵者帝大怒曰  
尖頭奴敢裁量朕耶還臺先斬此奴弼告屬官曰事  
君使田獵不過盤游其罪小不備不虞使戎寇恣逸  
其罪大方今北狄孔熾南虜未滅是吾憂也苟利國  
家吾寧避死乎帝聞而嘉之後田於山北獲麋鹿數  
千詔尚書發車牛五十乘運之帝尋謂從者曰筆公  
必不與我不如馬運之速而弼表已至謂秋穀懸黃  
麻菽布野賜矜緩使得收載帝謂左右曰筆公果如  
朕卜可謂社稷之臣後以巫蠱伏法時人寃之

伊馥傳

北魏史

公代人也少勇健走及奔馬善射力曳牛却行仕魏為侍郎太武將討涼州議者咸以無水草諫唯司徒崔浩勸行馥曰涼州若無水草何得為國宜從浩言帝善之及尅涼州顧謂浩曰馥智力如此終至公相特未讀書耳浩曰何必讀書然後為學衛青霍去病亦不讀書而致公輔遂拜秘書監賜爵河南公拜司空清約自守為政舉大綱而已 不苛碎大安二年領

太子太保三年平尚書事薨

北史本傳今祀鄉賢祠

庾業傳

北史

廣靈縣誌

卷十

藝文

十

公代人也後賜名岳其父及兄和辰世典畜牧苻氏內侮收歛畜產富擬國君劉顯謀逆道武外幸得其資用以和辰為內侍長岳為外朝大夫參預軍國從平中原拜安遠將軍又以戰功賜爵西昌公岳為將有謀畧士衆服其智勇名冠諸將及以所統六郡置相州即拜岳為刺史秉法平當百姓稱之遷司空侯官告岳衣服行止擬於人君遇道武不豫多猜忌遂誅之時人咸冤惜焉後詔為立廟令一州之人四時

致祭

祀鄉賢祠

袁孝孫傳

舊誌

公諱表其祖年老父吉家貧莫能供菽水以杷載乃翁送山中歸將投杷於火表年甚幼取而懸之吉問曰懸此何用表泣對曰預爲阿翁具吉聞言俛首悔悟表乃引杷循故跡載祖以還後杷跡所歷草皆偃生至今尚存人以爲孝感所致云

今祀鄉賢祠

明戶部江西司主事王公傳

邱齊衡

公諱尚文姓王氏少穎異讀書目數行下爲文操筆立就然不喜爲詞章訓詁之學每遇古聖賢忠孝節烈事輒欣然神往曰讀書人當如是矣宣德乙卯舉於鄉明年成進士授戶部江西司主事在部勤敏熟

於掌故雖老吏無以過也積宦旣久能聲益著當以次陞秩會正統十四年秋七月也先入寇司禮監王振挾帝親征大兵起行本部會推精明強幹數員以督兵餉僉曰莫有過於王某者尚文遂以督餉從八月己酉帝駐大同振益欲北出有以恐墮敵計密告振者振始懼班師至雙寨雨甚振初議道紫荊關由蔚州邀帝幸其第旣恐蹂其鄉禾稼復改道宣府軍士紆迴奔走壬戌始次土木瓦剌兵追至師大潰尚文得脫行數里駕久不至謂從者曰今師徒撓敗而主上無消息倘有不測吾何面目歸見中朝人士乎

吾當返與之同命從者有難色尚文曰臨難苟免吾不爲也遂奔還求上上已陷入瓦剌營擁而北行尚文踵駕號泣隨之遂被執不屈而死後英宗復辟錄死節之臣勅賜崇祀鄉賢廕子翊入監

贈光祿寺寺丞李公傳

杜 煥

公姓李氏諱景幼敏慧弱冠補博士弟子員博聞強識於書無所不窺屢困場屋遇益窮學益邃正德中起家歲貢判高郵州居官剛毅清慎蒞政嚴明以治行擢知河南開封府西華縣事益勵精有爲清操無異作判時吏畏其威民懷其德時值流賊猖獗所至

剽掠勢甚劇景乃整飭樓櫓操練士卒爲守禦計賊果率衆攻城景躬擐甲胄晝夜巡視以大義勸諭士民民見其忠義激發實出血誠皆樂爲之用相持日久糧且盡援兵不至以創殘餓羸之餘禦凶悍日益之衆備于東而缺于西雖有智者無以善其後矣及城陷景朝服北面再拜曰臣力竭矣城破被執賊持刀脅之降景厲聲曰我天子命吏豈向汝求活耶奴輩速殺我罵不絕口遂遇害給事吳玉榮以事聞武宗嘉其節勅賜忠義丞務郎光祿寺丞賜祭一壇廕子延齡入監未仕卒補廕嫡孫熙任河南歸德州通

判調直隸高邑縣知縣有政聲

韓氏雙孝傳

全懋官

韓一蘇弟一歐南村庠生邦和子也家世務農入橫經出負耒耕讀之暇閉門却掃不知有戶外事居家以孝友相先庭幃之內怡怡如也順治元年闖賊餘黨往來雲朔間所至村落一空莫敢誰何一日賊至縛邦和而拷之一蘇兄弟聞父被執惶遽失措急挺身向賊丐求願以身代辭甚哀賊并縛之兄弟受拷血肉淋漓哀籲不已賊憐其孝而釋其父一歐立斃一蘇亦垂死及賊退一蘇復甦聞其父存而喜曰吾

雖垂斃吾父尚存幸甚但痛吾弟之死爲過慘耳遂調養備至父得享其天年一時之人咸稱韓氏兄弟一死一生皆純孝云

國初死事周義士傳

李冀附

韓國瓚

周於德弟於道北鄉庠生周之屏子也家貧力學受業於父於德早歲遊庠一門之內規言矩行鄉人薰其德而善良咸師尊之順治五年總兵姜瓖叛據大同六年二月渾源逆黨朱廷佐糾集千餘人剽掠庄堡邑奸民李青許登旺等勾連賊衆圍攻縣城當是時城內無駐防兵邑令范公以大義勸諭士民晝夜

捍禦賊勢張甚城幾危者數矣之屏父子乃倡義招  
集鄉人諭之曰事急矣吾輩當出死力以赴國難若  
使劇賊得志吾等寧有子遺耶遂統率鄉民並中表  
李萇挺身赴援賊大至邀擊於後於德兄弟及萇大  
呼督戰衆寡不敵俱被執不屈而死噫一介書生橫  
身殉國穴頸洞霄斯可與古人爭烈矣因事未上達  
亦無卹典竟使英魂強魄悽風泣月磅礴於荒燐宿  
草之間悲夫

仝義士傳

郭磊

義士名觀吉廣邑巨族也性慷慨武健絕倫人以樊

廣靈縣誌

卷十 藝文

十四

噲目之公亦以噲自負順治五年姜逆叛亂據大同

廣邑土豪

李青等

倡亂聚衆攻城當是時賊黨洶洶援

城義士周於德兄弟遇難又無駐防兵邑令范公仰  
天嘆曰城休矣今大兵駐雲中有敢冒陳告難者乎  
觀吉奮臂大呼曰公用某某不惜死范壯之漏下三  
刻從西城縋出持短刀行山谷中次日傍午達雲中  
直抵幕府大呼求救時英王以懿親握兵符屯雲中  
聞之令反接而入問之遽道所以王壯之釋其縛賜  
之食觀吉大呼曰廣靈煙火不舉三日矣王賞臣臣  
食不下嚥王益竒之遂命騎兵往捕卽以觀吉爲鄉

導雷奔電馳一晝夜駐城西嶺時往返未及三日行  
五百里觀吉精神百倍抵城大呼曰天兵至矣范公  
聞之曰此全某聲也遂帥民兵開門殺出賊黨悉竄  
獲賊首<sub>李青</sub>戮於市仍赤其族賊平當事者欲上其  
事於朝范令曰吾不能防範於前微全某之力不及  
此敢自以爲功乎事遂寢義士之功亦未見錄後爲  
武庠卒且無後君子曰天道福善禍淫由來久矣今  
凶逆族滅義士亦無後天道茫茫尚可問哉

邑侯李公傳

王藎臣

公諱煥斗字谷愚江西新淦人康熙中知縣事時值

連歲旱疫十室九空蒞任之初卽詳請豁免絕戶錢  
糧兼籲賑濟皆如所請民困得甦竭力招徠勸墾流  
民復業舊例大同府大有倉捐貯米石俱令大同州  
縣運送出殺虎口交卸民困此役非一日矣時廣靈  
又派運七百石公復泣陳情苦兼請設法調劑通省  
照糧公捐事得寢民無派累其實心爲民多類此他  
如設義學修邑誌戒賭博示節儉警刁風除煩滌苛  
百廢俱舉在任九年清廉公正平恕有容祀名宦祠

詩

送李谷愚之任廣靈

侍讀施閏章  
宣城人

素交眼底獨推君  
古道文章迥不羣  
家傍清江心共許  
人當燕市手重分  
馬蹄曉踏白登雪  
雉堞晴看紫塞雲  
聞道襄陵多美酒  
不妨賓主共論文

送李谷愚之任廣靈

檢討黎騫  
清江人

十載題名重玉京  
今看結綬向邊城  
天涯別有江淹淚  
冰署人懷鮑叔情  
朔雪不侵燕塞路  
福星直指鴈門行  
安民卽是酬明主  
寒徹梅花人御羹

攝篆廣靈卽事

來臨

廣靈縣誌

卷十 藝文

十六

傲吏茹蔬樂有餘  
清虛莫嘆食無魚  
等閒片晷了公案  
一日猶讀半日書

廣靈道中呈李谷愚明府

靈邱縣令岳宏譽  
江南人

紆迴巖壑歷躋攀  
亂石盤旋行路艱  
塞杏不紅花欲掃  
邊榆初綻莢如環  
翻飛沙燕隨人舞  
駭逸山麇避馬還  
每過仙源須薄暮  
前村燈火近城闌

豐水夜月

李煥斗

城南風水夜鱗鱗  
一望平川自似銀  
靜影玲瓏飛玉鏡  
寒光蕩漾躍冰輪  
三更遣興花當澗  
十里尋谿月近人  
况是清秋風景別  
更從何處滌氛塵

社臺朝雨

李煥斗

清曉乘閒登社臺東南佳景望中開一川時雨滋禾黍百谷風濤吼澗雷山邑有年今可卜天工覆育自從來他時報賽酬龍母敢靳馨香薦玉醅

千福曉鐘

李煥斗

千福山頭春雪消兩川煙景夾山腰晨鐘忽發天邊響大覺初回夢裡蕉衲子入雲飛錫遠香厨隔澗引泉遙上方城郭聞雖近莫遣笙歌到寂寥

斗山積雪

李煥斗

翠獻迢迢南斗間瓏璵積雪隱蒼顏全封鳥道無行

廣靈縣誌

卷十 藝文

十七

徑迥入銀河絕仰攀玉峽盤回龍矯矯瓊巖深鎖月灣灣虛疑詩思侵人骨翹首雲中見此山

壺泉春柳

李煥斗

平原野望一山孤別有風光到玉壺幾度尋春詩未就數回遣興酒頻呼雨餘烟柳仍含綠風過巖泉似濺珠莫羨河陽桃李色青青兩岸更堪圖

飛鳳晴嵐

李煥斗

一道青山北郊橫傳名飛鳳跨遙天摩空欲吸桑乾才展翅應遮太白巔四序煙嵐迷出入終朝青靄異推遷翩躚宛似來儀瑞重樂虞周擊壤年

聖泉松風

李煥斗

古刹深藏倚澗阿何年選佛在烟蘿兩崖削壁窺天  
卜一水通幽灌木多谷口松濤疑嘯虎風邊鈴閣似  
鳴珂登臨欲認前朝蹟尚有莓苔碑可摩

白羊暮靄

李煥斗

重重紫色白羊頭聞說仙人頂上遊殘日石林紅靄  
靄黑雲牛馬晚悠悠夏王荒隴狐狸夕延昭孤城虎  
豹秋翹首故園家萬里西山一望可勝愁

初夏亂嶺關遇雪

李煥斗

冒雪登崖行路難臨高自悔着衣單邊山夏月如冬

廣靈縣誌

卷十

藝文

十八

月只少梅花拂繡鞍

過火燒嶺

李煥斗

策馬崇岡行步難杏花枝上鳥緡蠻自從身作延陵  
長幾度衝寒過此山

會課示諸生

李煥斗

我昔臨斯邑諸生多少年衣冠何濟濟詞貌亦便便  
期爾青雲器滿殼以當前倏忽六七襍諸生歲月遷  
皇家 兩羅士麟鳳未爭先諸生不自振莫道有司愆  
隣封各脫穎爾徒空羨淵詎獨諸生恥余顏亦赧焉  
懷哉須結網及時勿遲延高山勤仰止宮墻勉鑽研

白雪無凡調青雲在目前杯酒聊相告論文效昔賢  
勿嗔多責備交以直道全

社臺朝雨

王五鼎

迢鬱龍宮鎖絳臺此山生面又重開三農夏日瞻甘  
澍二月春風起蟄雷海氣浮空天際立晨光飛溼望  
中來年年乞與神靈祝禾黍含滋若醞醅

豐水夜月

庠生白屋龍  
邑人

寒潭幽徹躍潛鱗浪蕪推花簇爛銀蜃母遺珠升海  
嶠天孫肅駕輶冰輪中宵湛露虛涵影一片青光冷  
照人回顧悠然沉萬籟水雲縹緲靜無塵

廣靈縣誌

卷十 藝文

十九

社臺朝雨

前人

幾回憑眺獨登臺山色參差曉未開祠宇翬飛聯碧  
漢梵音傳偈隱殷雷斷雲拖墨穿林出積靄移陰拂  
面來四野蒼茫圖畫裏神功寂若似傾醅

斗山積雪

庠生王振斯  
邑人

崔嵬迥出白雲間春去秋來縞素顏嶺上梅花何處  
問望中鶴影杳難攀碾成晶玉原同色踏破瓊瑤第  
幾灣姑射羅浮清可並何須海外問三山

壺泉春柳

庠生白屋隆

突聳蒼崖片石孤山頭日日聽提壺澤濡新柳千章

潤風激寒泉萬竅呼嫩葉舒金澗湛露清波漱玉漾  
明珠右丞若使重相見一副烟稍望裏圖

千福曉鐘

庠生 李長榮 邑人

日出扶桑烟霧消松間殘月去山腰花宮鯨韻清塵  
夢禪舍莓苔映綠蕉諸介乍聞天路近一空方悟世  
緣遙年年風物不相異惟有寒雲鎖寂寥

斗山積雪

李長榮

遙峯隱隱碧雲間一夜冰花裹舊顏綴玉瓊枝松欲  
折尋梅瑤圃徑難攀美人踏月從何覓高士移床第  
幾灣說與南人渾不信夏深猶見雪鋪山

廣靈縣誌

卷十 藝文

二十

白羊暮靄

李長榮

春融芳草滿山頭鎮日喜看鹿豕遊黃石叱來遺跡  
遠魯戈麾處夕陽悠險因天設秦關古景被風彫漢  
塞秋歷盡興亡看此夕白雲紅日不勝愁

壺泉春柳

齊管

平川突兀小山孤山下靈泉若映壺吹浪池邊魚藻  
動啼晴枝上鳥聲呼謾誇彭澤千層柳且看眉山萬  
斛珠花滿河陽仙令植莫教悞認六朝圖

廣靈八景

刑部尚書 魏象樞 蔚州人

壺流一派潤桑田社雨濛濛雉堞邊晚聽鐘聲千福

頂遙看雪色斗山巔  
摩空鳳羽瞻雲氣  
傍石春泉覆柳烟  
更喜松濤來萬壑  
白羊頂畔說豐年

豐水夜月

李振藻  
蔚州人

澄波天共碧  
素影映寒流  
蕩漾清光滿  
潺湲夜色幽  
沙明宜宿鴈  
石靜不驚鷗  
水底魚龍動  
驪珠若可求  
社臺朝雨  
前人

登眺怡情處  
輕陰朝雨飛  
空濛迷宿露  
黯淡掩清暉  
烟鎖龍宮隱  
雲連雉堞微  
凭高凝望久  
冉冉濕人衣  
千福曉鐘  
前人

廣靈縣誌

卷十 藝文

二十一

瀏澆山光淨  
噌吰曉色分  
靜聽看悟道  
從此息塵氛  
斗山積雪  
前人

高巖當戶牖  
積雪未全消  
翠嶂遺殘壁  
晴峯砌碎瑤  
玉龍飛不去  
鹽虎若爲妖  
誰道西陵遠  
依稀憶斷橋  
壺泉春柳  
前人

一峯奇絕處  
石罅吐甘泉  
疎柳浴新月  
垂楊淡曉烟  
綠陰堪避暑  
清蔭可調絃  
坐聽鶯聲轉  
胸襟自爽然  
飛鳳晴嵐  
前人

青嶂如屏峙  
紆迴路幾盤  
拖青疑點翠  
變赤若流丹  
杳靄雲迷樹  
離奇霧鎖巒  
翱翔如起舞  
凝睇亦奇觀

聖泉松風

前人

何處宮商奏松陰夜有聲驚濤鳴萬壑爽籟靜三更  
似聽雲和瑟如聞緱嶺笙石泉相伴響零露史淒清

白羊暮靄

前人

黛色菁葱遠依依日欲斜層峯籠曉霧殘照映明霞  
漸覺流雲換移將薄靄遮相看久不厭乘興訪仙家

豐水夜月

少李旭升  
蔚州人

渺渺長河接遠天碧空如洗映平川競看玉鑑雲邊  
出忽訝冰輪水底圓皎潔寒光驚鳥鵲婆娑素影下  
嬋娟琉璃千頃渾如畫勾引幽人夜未眠

廣靈縣誌

卷十 藝文

二十二

社臺朝雨

前人

向曉登臺雲氣昏蛟龍吐沫灑郊原初迷遠樹微烟  
鎖漸漲前溪細浪噴四野農夫皆戴笠幾家村店未  
開門空濛景色誰能畫惆悵行人欲斷魂

千福曉鐘

前人

初日方升曉氣清崇巖風送寺鐘鳴驚回夢幻悠揚  
韻催起僧伽斷續聲嚮遏層空雲出岫音聞下界客  
登程鏗然戛擊相賡和喚醒人間名利情

斗山積雪

前人

遙瞻曙色映晴巒積素凝暉暉夏亦寒高矗尖峯排玉

笋低眠圓石疊銀盤光搖雲漢驚飛鴈色妬琪花招  
舞鸞誰道峩眉天際遠與君同作蜀山看

壺泉春柳

前人

碧峯高處瀉寒流柳色參差映寺幽雨後眉纖含翠  
媚風前腰細弄絲柔綠陰密蔭堪消暑清影蕭疎更  
耐秋不似灞橋攀贈處依依牽惹別離愁

飛鳳晴嵐

前人

青嶂如屏綺繡鋪儼然噉羽下雲衢鳥窺穹谷雲霞  
變人到中峯景物殊乍見烟光籠遠樹遙看嵐氣映  
平蕪昏朝相對襟懷爽付與丹青入畫圖

廣靈縣志

卷十 藝文

二十三

聖泉松風

前人

古寺相傳幾百年虬枝屈曲鎖蒼烟聲來空谷疑猿  
嘯濤瀉清宵醒鶴眠謾謾似聞金粟墜淒淒如聽玉  
簫傳夜深月上芸牕靜逸韻偏能到枕邊

白羊暮靄

前人

層巒高峙鬱蒼蒼疊翠含烟鎖夕陽燦爛朱霞驕日  
影迷離青靄薄山光樵人罷採收柯返牧子思歸驅  
犢忙暝色依微堪遠睇白雲深處是吾鄉

麟

魏象樞

刑部尚書

陽回北斗一麟孳牛尾麕身更不疑紫塞籠烟徵瑞

氣龍沙度雪接昌期風和雨潤逢年後子孝臣忠報  
國時自是

聖朝仁德感輶軒好載史中詩

其二

驚聞神物產山田陰雨牛鳴豈偶然斗室霞光村牧  
怪空梁月照野人憐香含七竅端端異甲裂千紋片  
片堅倘得靈胎圖上苑

御屏應注使君賢

前題

魏學誠 蔚州進士中書

萬土車書正永清

廣靈縣誌

卷十 藝文

二十四

九重雨露散邊城頓教寒谷生春色遂有深仁暢物情赤  
紱果從何日繫青編應待此時成惜君不作潛龍種  
空向人間得美名

前題

李昉辰 蔚州侯補京職

延陵治譜達明光

聖代符徵景歷昌已見祥麟生晉土真同彩鳳到岐陽麇  
身牛尾文霞燦馬足龍麟繡紱香欲贊高深慚載筆  
萬年恭已仰虞皇

前題

李旭升 蔚州進士

太平時節事多幽掩卷河圖彷彿求口吐丹書身是

甲軀非白鹿背皆疇農房止見飛虹降上苑還宜畫  
影遊有道吾

君文德盛萬方從此荷天休

前題

李煥斗

孟冬十月冰堅池延陵忽覩麒麟孳野老獻來驚且  
疑咸稱此獸見聞希更言牛母孕於茲陰雨長鳴登  
山岬或逐川虹飲澗漪不受鞭驅不曳犁皎日當空  
出腹啼朱霞爛熳天馬嘶錦麟繡甲烏玉蹄頭如蒼  
龍尾如璃脊似靈鼉腹似龜交加四股聳熊羆光映  
星文何岐嶷傳於史兮歌於詩豈若吾身親見之

廣靈縣誌

卷十 藝文

二十五

聖人在御萬邦熙後比軒皇前比羲天生神物應昌期麟  
爲國瑞固其宜西狩曾獲泣宣尼玉書徵異又同時  
何幸明良會合奇卿雲復旦日重離河清海晏衣裳  
垂繪圖若達

九重知羣臣拜手

天顏喜

詔入新編定勿遺正是曠古靈胎不可沒教兒染翰一賡  
題

祝

萬壽

韓國瓚

玉露飄青瑣金鋪立廟廊  
爐烟添柳重韶樂順風長  
委佩搖秋色戎冠帶曉霜  
中秋祝

聖壽萬寶慶無疆

王戶曹

尚文

韓廷魁

英廟蒙塵日奸臣悞國時  
王師一鼓盡虜騎四郊馳  
玉石俱爲燼衣冠悉見羈  
神龍悲失水凍雀苦無枝  
泣血瞻行殿傷心踵賊帷  
空傳袁盎脫終結仲由綏  
浩氣山河壯英名萬古垂  
我來瞻廟貌留作蓋臣碑

李光祿

景

薛搗謙

烈烈西華宰城亡身與亡  
執戈衛社稷環甲保金湯

廣靈縣誌

卷十

藝文

二十六

外絕虬蟉援中無雀鼠糧  
艱危同越石拮据似睢陽  
罵賊辭何壯臨亡氣亦剛  
孤忠昭白日大義凜秋霜  
兩錫絲綸寵千秋俎豆光  
不令顏許輩擅美獨流芳

前題

韓士傑

取義亡身骨鯁臣精忠大節與時新  
魂依北闕家何有命絕南州志未伸  
古墓雲封詩是淚孤城露起血爲燐  
獨羨常山一片舌今日猶堪泣鬼神

袁孝孫

表

譚民聽

垂髫應未學至孝已天成  
譎諫規親過微言起悟情  
乃翁全晚德而祖保餘齡  
偃草留奇跡懸杷著美名

孩提能幹蠱閭里共敦行菽水娛親志羹藜竭子誠  
牽車而服賈秉耒以深耕孝養厥父母毋忝爾所生

韓孝子 一蘇一歐

李元凱

骨肉緣枝葉急難必相先爰有韓家子時當開國年  
父爲賊所縛子代父求憐兄弟被慘毒肌膚無屬連  
哀哉弟已斃幸矣翁猶全雙孝萃一族後生駕前賢  
存亡兩無愧伯仲俱足傳輶軒如有採將以付斯篇

周義士 于德于道

孫尚元

國朝定鼎初豺虎方搆亂結黨肆逆凶居民若塗炭  
城池久被圍牧圉誰當捍倡義集鄉兵挺身赴國難

廣靈縣誌

卷十 藝文

二十七

詩書雖夙敦金革未習慣衆寡勢旣殊貞邪何由判  
弟兄俱慘亡血肉同糜爛英俊事不成廢書起三嘆

王主事殉節沙漠 尚文

白百齡

明帝還師土木間中臣失律陷邊關九重日月光何  
在千里鑾輿駕莫攀徒跌但思依聖主殺身猶似列  
朝班侍中有血君王識留取芳名配段顏

李光祿殉難西華 景

杜 暉

六七猖狂勢自橫西華蕞爾守孤城情甘赴死臣心  
盡志矢舍生大義明清穎長留雲靄靄鴻溝猶憶淚  
盈盈要知俎豆千年事誰信當時肯幸生

韓一蘇一歐兩孝子

社 叢

闖孽縱橫日月昏韓家孝友聚南村但知救父情偏  
急詎信捐軀志愈敦萬死可憐傷令弟更生猶幸得  
賢昆干戈擾攘逃亡裏誰識人倫重報恩

周李中表起義兵

于德于道莫

劉 輝

攻城土賊仗姜瓖周李援兵起北鄉共曉妖軍方濟  
濟那知吾志自堂堂周家兄弟成仁樂李氏英雄死  
義香事越百年精氣壯至今鄉里有輝光

王戶曹

尚文

王國瓚

小豎弄兵事遠征也先騎到地天崩從軍無狀臣當

廣靈縣誌

卷十 藝文

二十八

死願作忠魂扈聖明

袁孝孫

古絕

宋生桂

懸杞一譎諫綱常萬古存幹蠱真孝子何僅稱慈孫

王戶曹

尚文

王賜名

由來志士性情真督餉從軍翊至尊歛隕大星摧柱  
石長留浩氣振乾坤君恩崇祀光泉壤廕典榮申耀  
里門展卷低徊三歎息未諱薤露已銷魂

李光祿

景

杜 叢

拜爵敢辭守土難赤心不覺此身单孤忠血染河西  
水隱恨魂歸塞北戀蜀將無頭生氣在長山有舌罵

聲殘墓碑憑弔堪惆悵風動白楊近厲壇

學舍春夜遇雨

司訓 周天申

春雨纏綿晝迄宵遠山幽岫水聲遙杏林暗想滋春色柳岸潛知潤綠條農喜詰朝和露種牧愁午夜冷風飄淒涼學舍聽殘漏百結憂思酒不消

吊仝義士

杜 暉

烈烈英雄功最奇短刀取救夜飛馳恨無史叙全城績空有人嗟乏嗣悲千載白雲山渺渺一坏黃土草離離可憐寒食梨花雨誰向春風奠一齋

節婦李氏

陳吉榮母

孫尚元

廣靈縣誌

卷十 藝文

二十九

苦節終身事可憐追思一度一潜然弓箕負荷兒先隕門戶操持婆更賢撫有弱孫傳素業應無遺恨到黃泉殮衣點點血痕透布縷看來勝畫箋

周義士兄弟

李冀附

王國瓚

一時邊地聚奸民韋帶英雄自有真動地千軍聲震野仰天一慟任亡身烈風特異狗名士高節應推草莽臣更有義俠同赴難山川輝映幾完人

十月朔日暮雪思親

韓士奇

秋盡冬初日色暉墳前徒化紙錢飛蕭蕭暮雪殺塚草慘慘愁雲動我邨郊外空懷王哀意高堂難舞老

萊衣音容欲覓歸何處獨守孤墳不忍違

飛鳳晴嵐

王懋業

韶光掩映潤如酥霞繞峰頭疑有無何日坐余山閣  
上春花春鳥繪成圖

壺泉春柳

王懋業

嫩綠池邊柳繞林聽鳥鳴新鶯初出谷願借一枝榮  
豐年

白維翰

太平天子當陽位鳳舞麟遊治化隆春作秋成感地力日  
暄雨潤戴天功

一人有慶一時泰萬寶偕登萬國同玉燭正調翔洽日南

廣靈縣誌

卷十

藝文

三十

風習至樂年豐